

Тоғдан ҳам оғир



15:15 / 04.06.2025 1318

Абдуллоҳ ибн Масъуд розияллоҳу анҳу Набий соллаллоҳу алайҳи васаллам билан бирга кетаётган эдилар. Бир дарахт ёнидан ўтиб қолишди. Шунда Набий соллаллоҳу алайҳи васаллам у кишига дарахтга чиқиб, мисвок қилиш учун шох кесиб келишни буюрдилар. Ибн Масъуд розияллоҳу анҳу дарахтга кўтарилдилар, у киши енгил, жуссалари озғин одам эдилар. Бир шохдан кесиш учун уни торта бошладилар. Шу онда шамол эсиб, либосларини ҳаракатга келтириб, болдирларини очиб қўйди, қарасалар, у болдирнинг иккиси ҳам ингичка, кичкина экан. Одамлар болдирнинг ингичка, ориқлигини кўриб кулиб юбордилар. Шунда Набий соллаллоҳу алайҳи васаллам: «Нимага куляпсизлар?! Болдирининг ингичкалиги учунми?! Жоним қўлида бўлган Зотга қасамки, албатта, у иккиси (болдири) тарозида Уҳуддан ҳам оғирроқдир» дедилар.

Ҳақиқат баъзида кўрганингиздек ва эшитганингиздек бўлмайди. Улуғ саҳобийнинг икки болдирлари кўринишидан ингичка, аммо охират тарозисида Уҳуд тоғидан ҳам оғир бўларкан.

«Вазиятларни бошқариш санъати» китоби асосида

Нозимжон Ҳошимжон тайёрлади.

Ушбу мақола Ўзбекистон Республикаси Дин ишлари бўйича қўмитасининг 2025 йил 17 мартдаги 03-07/1750-сонли рухсати асосида тақдим қилинди.